

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI SELASA, 31 OKTOBER 2023, PUKUL 10.00 PAGI

Bil. 7

WAKTU PERTANYAAN-PERTANYAAN MENTERI

1. PR-1523-MQT2450

Tuan Suhaizan bin Kaiat [Pulai] minta **PERDANA MENTERI** menyatakan perkembangan lawatan kerja ke Arab Saudi, Turkiye dan Mesir berhubungan dengan serangan Israel ke atas rakyat Palestin di Gaza. Apakah bentuk ancaman yang diterima oleh Malaysia daripada negara-negara barat yang menyokong Israel susulan atas pendirian Malaysia terhadap Palestin dan apakah langkah-langkah yang bakal diambil oleh Malaysia bagi menghadapi segala ancaman ini supaya tidak memberi kesan besar terhadap rakyat dan ekonomi negara.

2. PR-1523-MQT2439

Dato' Wira Dr. Ku Abd Rahman bin Ku Ismail [Kubang Pasu] minta **PERDANA MENTERI** menyatakan :

- (a) apakah strategi dan langkah-langkah yang diambil oleh Kerajaan bagi memitigasi nilai eksport yang menurun sebanyak 8.4% bagi tempoh Januari - September 2023 berbanding dengan tempoh yang sama bagi tahun 2022. Trend menurun ini didapati bermula pada Jun 2023 dan dijangka akan berterusan hingga akhir tahun 2023; dan
- (b) jumlah pelaburan dan jenis/sektor industri yang akan dilaksanakan oleh pelabur-pelabur (secara terperinci) dari Amerika Syarikat, United Arab Emirates (UAE) dan Arab Saudi, iaitu hasil lawatan YAB. Perdana Menteri ke negara-negara berkenaan baru-baru ini.

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI SELASA, 31 OKTOBER 2023, PUKUL 10.00 PAGI

Bil. 63

WAKTU PERTANYAAN-PERTANYAAN MENTERI

PERTANYAAN-PERTANYAAN BAGI JAWAB LISAN

1. PR-1523-L21433
Dato' Haji Shamshulkahar bin Mohd Deli [Jempol] minta **MENTERI PENDIDIKAN TINGGI** menyatakan apakah usaha Kementerian bagi memastikan graduan tempatan bersedia memenuhi keperluan tenaga kerja bagi 21 industri tumpuan dalam Pelan Induk Perindustrian Baharu 2030 (NIMP 2030).
2. PR-1523-L22519
Tuan Shaharizukirnain bin Abd. Kadir [Setiu] minta **MENTERI SUMBER MANUSIA** menyatakan secara terperinci insentif Kerajaan bagi memastikan wanita kembali bekerja terutama wanita muda yang berpendidikan sekali gus merapatkan jurang jantina dalam pasaran buruh.
3. PR-1523-L21507
Tuan Lee Chean Chung [Petaling Jaya] minta **MENTERI PELABURAN, PERDAGANGAN DAN INDUSTRI** menyatakan :
 - (a) perancangan jangka sederhana untuk pembangunan teknologi *battery-swapping* motosikal elektrik di Malaysia; dan
 - (b) adakah Kementerian akan meneroka kerja sama strategik dengan pemain-pemain industri di negara jiran seperti Oyika Pte Ltd (Singapura) dan Gogoro (Taiwan) untuk membangunkan ekosistem industri *battery-swapping* yang mampan.

4. PR-1523-L22316

Dato' Dr. Alias bin Razak [Kuala Nerus] minta **MENTERI KERJA RAYA** menyatakan :

- (a) statistik kemalangan maut yang disebabkan oleh kerja pembaikan jalan raya di seluruh negara; dan
- (b) sejauh mana pemantauan terhadap prosedur operasi standard (SOP) yang dilaksanakan oleh kontraktor semasa proses pembaikan jalan raya dilakukan.

5. PR-1523-L21110

Datuk Seri Johari bin Abdul Ghani [Titiwangsa] minta **MENTERI EKONOMI** menyatakan :

- (a) peratusan pemilikan ekuiti oleh Bumiputera antara tahun 2010 hingga 2022; dan
- (b) faktor-faktor kegagalan pemilikan ekuiti oleh Bumiputera di negara ini yang masih belum mencapai sasaran 30 peratus seperti ditetapkan.

6. PR-1523-L22615

Datuk Wan Saifulruddin bin Wan Jan [Tasek Gelugor] minta **MENTERI PERTANIAN DAN KETERJAMINAN MAKANAN** menyatakan apa langkah Kerajaan untuk menyelesaikan masalah pencemaran akibat ladang babi di Kampung Selamat serta kesan sekitaran seperti percikan kepada pengguna jalan raya akibat penggunaan lori tidak bertutup untuk mengangkut babi, pencemaran bau kepada penduduk dan kesan kepada nelayan sungai.

7. PR-1523-L21416

Puan Isnaraissah Munirah Majilis [Kota Belud] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan secara terperinci kos keseluruhan (jenis projek dan penambahbaikan) dan garis masa yang ditetapkan bagi mengatasi masalah bekalan air bersih di Sabah.

8. PR-1523-L22471

Tuan Sabri bin Azit [Jerai] minta **MENTERI KEMAJUAN DESA DAN WILAYAH** menyatakan sejauh mana Program Peningkatan Pendapatan (PPP) telah berjaya membantu golongan miskin tegar di negara ini.

9. PR-1523-L21646
Datuk Seri Haji Jalaluddin bin Haji Alias [Jelebu] minta **MENTERI PERTANIAN DAN KETERJAMINAN MAKANAN** menyatakan apakah usaha konkrit daripada pihak Kementerian dalam memerangi serta menghapuskan budaya "orang tengah" dalam sektor pertanian dan rangkaian bekalan makanan sekaligus dapat mengawal kos sara hidup yang semakin meningkat.
10. PR-1523-L22548
Datuk Haji Awang bin Hashim [Pendang] minta **MENTERI SUMBER MANUSIA** menyatakan jumlah pekerja asing yang berada dalam negara dan apakah langkah diambil Kerajaan dalam mengurangkan kebergantungan kepada tenaga kerja warga asing dan mengoptimumkan tenaga kerja tempatan berkemahiran.
11. PR-1523-L21455
Tuan Mohamad Shafizan Haji Kepli [Batang Lupar] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan status Projek Pengawalan Hakisan Pantai di Parlimen Batang Lupar serta langkah-langkah intervensi bagi mengawal hakisan pantai di kawasan yang terjejas seperti di Tanjung Riong, Maludam, Kg. Semarang dan Batang Maro ke Kampung Paloh.
12. PR-1523-L22537
Tuan Rushdan bin Rusmi [Padang Besar] minta **MENTERI PENDIDIKAN TINGGI** menyatakan keberhasilan program Asasi, TVET, dan Politeknik dan adakah ia mencapai objektif asal penubuhannya.
13. PR-1523-L21629
Tuan Syed Ibrahim bin Syed Noh [Ledang] minta **MENTERI EKONOMI** menyatakan secara terperinci berkenaan:
- (a) data impak mutakhir tiga kempen utama Inisiatif Usahawan Makanan (INSAN), Inisiatif Usahawan Tani (INTAN) dan Inisiatif Operator Perkhidmatan (IKHSAN) di bawah Inisiatif Pendapatan Rakyat (IPR); dan
 - (b) perancangan yang akan dilaksana bagi menambah baik dan meluaskan capaian kepada lebih ramai penerima.

14. PR-1523-L22077

Dato' Hajah Mumtaz binti Md Nawî [Tumpat] minta **MENTERI PELANCONGAN, SENI DAN BUDAYA** menyatakan insentif dan agensi yang membantu *Tourist Information Centre* (TIC) dalam merancakkan sektor pelancongan negara yang mendatangkan pendapatan besar kepada negara terutama kepada negeri Kelantan dan berapa peruntukan serta kakitangan TIC di seluruh negara.

15. PR-1523-L22680

Datuk Jonathan Yasin [Ranau] minta **MENTERI KERJA RAYA** menyatakan bilakah pihak Kementerian akan memberi kelulusan untuk menaik taraf pembinaan jalan dari Pekan Kundasang - SK Kundasang - Jln. Semuruh Kinoundusan - Kg. Pinausok kerana permohonan naik taraf jalan ini sudah lama dibuat.

16. PR-1523-L21963

Tuan Fathul Huzir bin Ayob [Gerik] minta **MENTERI KEMAJUAN DESA DAN WILAYAH** menyatakan melihat semula tenaga boleh baharu terutamanya tenaga solar di kawasan pedalaman bagi masyarakat Orang Asli kerana kebanyakannya tidak diselenggara dan tidak boleh digunakan lagi.

17. PR-1523-L21769

Tuan Zahir bin Hassan [Wangsa Maju] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan :

- (a) sejauh mana kejayaan pelaksanaan perancangan *centralised sewage system* (CSS) berdasarkan RMKe-12; dan
- (b) strategi Kementerian menghadapi kelewatan siap CSS yang telah menjejaskan pengeluaran Sijil Pematuhan Siap dan Pematuhan (CCC) sehingga mengakibatkan kelewatan penyerahan kunci kepada pembeli rumah.

18. PR-1523-L22244

Datuk Che Mohamad Zulkifly bin Jusoh [Besut] minta **MENTERI KERJA RAYA** menyatakan secara terperinci mengenai projek di bawah RM50 juta:

- (a) bagi tahun 2018-2023, berapa yang telah dirancang berbanding projek yang telah siap di Terengganu (mengikut tahun dan nilai projek); dan
- (b) punca dan faktor yang menyebabkan kelewatan memulakan projek pembangunan di Terengganu.

19. PR-1523-L21792

Tuan Chow Yu Hui [Raub] minta **MENTERI PENDIDIKAN TINGGI** menyatakan bilangan kemasukan pelajar ke jurusan undang-undang di UM dan UKM berdasarkan pecahan universiti, kaum (Melayu, Cina, India, Bumiputera bukan Melayu Semenanjung, Bumiputera Sabah, Bumiputera Sarawak dan lain-lain) dan kelayakan (STPM, Matrikulasi, Asasi dan lain-lain) dari tahun 2019 hingga 2023.

20. PR-1523-L22268

Dr. Siti Mastura binti Muhammad [Kepala Batas] minta **MENTERI PELANCONGAN, SENI DAN BUDAYA** menyatakan :

- (a) adakah muara Sungai Muda khususnya pesisir Pantai Kg. Kuala Muda akan dizonkan sebagai kawasan pelancongan dan berapa jumlah peruntukan; dan
- (b) senaraikan masjid di Pulau Pinang yang diwartakan sebagai status Masjid Pelancongan.

21. PR-1523-L21412

Puan Isnaraissah Munirah Majilis [Kota Belud] minta **MENTERI PERTANIAN DAN KETERJAMINAN MAKANAN** menyatakan adakah Kementerian akan membenarkan Kerajaan Sabah mengimport sendiri beras bagi mengimbangi bekalan dan harga beras melalui pendekatan yang lebih rapi berdasarkan landskap sosial dan keunikan geografi di sini.

22. PR-1523-L21964

Tuan Fathul Huzir bin Ayob [Gerik] minta **MENTERI PELANCONGAN, SENI DAN BUDAYA** menyatakan inisiatif Kementerian dalam memajukan sektor pelancongan di sempadan Pengkalan Hulu, Malaysia-Betong, Thailand.

23. PR-1523-L21857

Puan Rodziah binti Ismail [Ampang] minta **MENTERI KEMAJUAN DESA DAN WILAYAH** menyatakan sejauh mana sambutan dan kejayaan pembangunan sumber manusia dan pemerkasaan modal insan berteraskan pembangunan kompetensi, pembelajaran berterusan dan kemajuan kerjaya bagi melengkapkan anggota KEMAS dengan sikap (*attitude*), kemahiran (*skills*) dan pengetahuan (*knowledge*) yang bersesuaian.

24. PR-1523-L22402

Dato' Indera Dr. Suhaili bin Abdul Rahman [Labuan] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan :

- (a) bilakah kerja-kerja menaik taraf paip-paip air di W.P. Labuan siap dilaksanakan sepenuhnya dan sampai bilakah tindakan bahagian bekalan air (BBA) yang mencatu bekalan air bersih setiap minggu dapat dihentikan; dan
- (b) berapa lama lagi rakyat Labuan menderita akibat ketidakcekan pihak pengurusan SESB kerana masalah gangguan bekalan elektrik semakin berlarutan dan bertambah teruk. Inikah penghormatan yang sepatutnya diberikan oleh Kerajaan Pusat kepada Sabah apabila penyerahan Labuan yang bertujuan untuk dimaju dan dibangunkan namun setelah 39 tahun menjadi Wilayah Persekutuan yang ke-2, Labuan masih dan tetap lagi mundur sama ada dari aspek pembangunan mahupun ekonominya.

25. PR-1523-L21333

Datuk Seri Panglima Bung Moktar bin Radin [Kinabatangan] minta **MENTERI EKONOMI** menyatakan apakah pendirian Kerajaan dalam memastikan pembangunan wilayah yang seimbang. Adakah Kerajaan akan meningkatkan peruntukan kepada Sabah dan Sarawak selaras dengan Perjanjian Malaysia 1963 yang memperuntukkan Kerajaan Persekutuan akan memberi peruntukan untuk membangun Sabah dan Sarawak.

26. PR-1523-L22545

Datuk Haji Awang bin Hashim [Pendang] minta **MENTERI PENDIDIKAN TINGGI** menyatakan pendekatan untuk menggalakkan anak muda menyertai pendidikan TVET dan apakah tindakan diambil bagi memastikan bidang TVET sentiasa signifikan dengan keperluan alam pekerjaan seterusnya menjamin kebolehpasaran golongan terbabit.

27. PR-1523-L22464

Tuan Lee Chuan How [Ipoh Timor] minta **MENTERI SUMBER ASLI, ALAM SEKITAR DAN PERUBAHAN IKLIM** menyatakan apakah inisiatif yang telah diambil untuk menggalakkan kajian dan pembangunan REE di Malaysia setakat ini.

28. PR-1523-L22102
Dato' Seri Hamzah bin Zainudin [Larut] minta **MENTERI EKONOMI** menyatakan mengapa kedaulatan ekonomi negara diketepikan dan apakah justifikasi apabila syarat pemilikan ekuiti tempatan tidak lagi dikuatkuasakan dalam pendekatan liberal Ekonomi MADANI sehingga syarikat seperti TESLA dan Starlink diberikan pengecualian 100% pemilikan asing oleh Kerajaan PH-BN.
29. PR-1523-L21803
Tuan Tan Hong Pin [Bakri] minta **MENTERI PELANCONGAN, SENI DAN BUDAYA** menyatakan bilakah Kementerian akan mengumumkan kelonggaran syarat permohonan bagi program MM2H. Apakah usaha Kementerian dalam meningkatkan kualiti dan kecekapan pengurusan permohonan program MM2H dan bagaimanakah Kementerian meningkatkan keberkesanan pemasaran program ini di peringkat global.
30. PR-1523-L22015
Tuan Haji Kamal bin Ashaari [Kuala Krau] minta **MENTERI KEMAJUAN DESA DAN WILAYAH** menyatakan :
(a) adakah pihak Kementerian akan meneruskan program GIATMARA ataupun adakah GIATMARA akan menyerap masuk silibus TVET; dan
(b) apakah pihak Kementerian merancang untuk mewujudkan satu cawangan di Kuala Krau.
31. PR-1523-L21318
Dato' Haji Adnan bin Haji Abu Hassan [Kuala Pilah] minta **MENTERI KEMAJUAN DESA DAN WILAYAH** menyatakan langkah yang telah dan bakal dilaksanakan Kementerian bagi memastikan bekalan air bersih luar bandar di seluruh perkampungan Orang Asli terutamanya di Parlimen Kuala Pilah dapat disalurkan dengan baik.
32. PR-1523-L22540
Tuan Rushdan bin Rusmi [Padang Besar] minta **MENTERI SUMBER MANUSIA** menyatakan bilakah tarikh kuatkuasa Akta Keselamatan dan Kesihatan Pekerjaan pindaan 2022 serta perancangannya.
33. PR-1523-L22364
Tuan Chong Zhemini [Kampar] minta **MENTERI EKONOMI** menyatakan status untuk menoktahkan kemiskinan tegar dan adakah sasaran untuk menoktahkan kemiskinan tegar akan dicapai tahun ini.

34. PR-1523-L22170

Tuan Wan Razali bin Wan Nor [Kuantan] minta **MENTERI PERTANIAN DAN KETERJAMINAN MAKANAN** menyatakan :

- (a) berapa bilangan keseluruhan Taman Kekal Pengeluaran Malaysia (TKPM) dan status keaktifan semasa setiap kawasan; dan
- (b) berapa jumlah pengeluaran sebenar berbanding unjuran pengeluaran setiap TKPM.

35. PR-1523-L21367

Dato' Sri Sh Mohmed Puzi bin Sh Ali [Pekan] minta **MENTERI EKONOMI** menyatakan apakah inisiatif Kerajaan dalam merapatkan jurang ketidakseimbangan pembangunan dan ekonomi yang semakin melebar.

36. PR-1523-L21856

Tuan Khoo Poay Tiong [Kota Melaka] minta **MENTERI PERTANIAN DAN KETERJAMINAN MAKANAN** menyatakan apakah langkah segera Kementerian untuk mengatasi masalah kekurangan beras putih dalam pasaran dan kesediaan Kementerian memberi AP kepada syarikat baru selain daripada BERNAS untuk mengimport beras ekoran insiden kekurangan beras di pasaran.

37. PR-1523-L21187

Tuan Prabakaran A/L M Parameswaran [Batu] minta **MENTERI EKONOMI** menyatakan apakah pendekatan dan penyelesaian yang akan diambil dalam jalinan usahasama rentas Kementerian antara ekonomi dan sumber manusia dalam isu gaji progresif.

38. PR-1523-L22588

Tuan Mohd Nazri bin Abu Hassan [Merbok] minta **MENTERI KERJA RAYA** menyatakan adakah pihak Kerajaan merancang untuk menaik taraf Jambatan Semeling (K167) memandangkan keadaan lalu lintas di Jalan Lencongan Barat (FT257) semakin sesak. Sekiranya ya, bila akan dilaksanakan. Sekiranya tidak, apa alasannya.

39. PR-1523-L21369

Dato' Sri Sh Mohmed Puzi bin Sh Ali [Pekan] minta **MENTERI PELANCONGAN, SENI DAN BUDAYA** menyatakan apakah tindakan Kementerian dalam mengawal harga tiket dan yuran kemasukan bagi tempat tarikan pelancong supaya lebih berpatutan terutamanya untuk pelancong tempatan.

40. PR-1523-L22035
Tuan Mohd Azizi bin Abu Naim [Gua Musang] minta **MENTERI KERJA RAYA** menyatakan mekanisme Kementerian bagi memastikan kontraktor yang melaksanakan kerja-kerja pembinaan jalan akan mematuhi garis panduan keselamatan di tapak pembinaan dan di persekitaran kawasan pembinaan.
41. PR-1523-L22630
Dato' Rosol bin Wahid [Hulu Terengganu] minta **MENTERI PELANCONGAN, SENI DAN BUDAYA** menyatakan perancangan untuk memulihkan aset pelancongan seperti pusat perkelahan Air Terjun Sekayu dan Belukar Bukit di Hulu Terengganu yang terbengkalai dan terbiar.
42. PR-1523-L22254
Tan Sri Haji Abdul Hadi bin Awang [Marang] minta **MENTERI PERTANIAN DAN KETERJAMINAN MAKANAN** menyatakan apakah bentuk kerjasama yang akan dilakukan antara Malaysia dan Iran dalam bidang keterjaminan makanan (*food security*) khususnya aktiviti-aktiviti penyelidikan dan industri halal.
43. PR-1523-L21124
Dato' Sri Dr. Wee Jeck Seng [Tanjung Piai] minta **MENTERI SUMBER MANUSIA** menyatakan tindakan Kerajaan untuk menggalakkan pekerja gig mencarum SKPS dan SOCSO berikutan laporan Perbadanan Ekonomi Digital Malaysia (MDEC) bahawa hanya terdapat 33% jumlah pekerja gig yang berdaftar di bawah PERKESO.
44. PR-1523-L21128
Dato' Sri Dr. Wee Jeck Seng [Tanjung Piai] minta **MENTERI KERJA RAYA** menyatakan tarikh siap projek naik taraf jambatan di Jalan Kg. Sawah, Pekan Nanas yang sudah begitu lama tergendala dan menjadi rungutan rakyat Tanjung Piai.
45. PR-1523-L21141
Dato' Muhammad Bakhtiar bin Wan Chik [Balik Pulau] minta **MENTERI PELANCONGAN, SENI DAN BUDAYA** menyatakan usaha terkini Kementerian menangani isu kos bahan mentah yang tinggi yang terpaksa ditanggung oleh pengusaha industri batik.

46. PR-1523-L21528

Tuan Haji Aminolhuda bin Hassan [Sri Gading] minta **MENTERI SUMBER MANUSIA** menyatakan seiring dengan agenda KSP RMK-12 dalam mencapai negara berpendapatan tinggi dan meningkatkan tenaga mahir tempatan, apakah perancangan dan usaha Kementerian dalam mencapai dua agenda ini dengan keadaan belia sekarang yang tidak minat untuk menyambung pelajaran mereka dan hanya mahu terlibat dalam ekonomi gig dan menjadi pempengaruh (*influencers*).

47. PR-1523-L21858

Tuan Manndzri bin Nasib [Tenggara] minta **MENTERI SUMBER MANUSIA** menyatakan berapa jumlah pemegang Sijil dan Diploma Kemahiran Malaysia (SKM/DKM) atau tenaga kerja berkemahiran yang direkodkan sehingga kini di dalam bidang *Battery Electric Vehicle (BEV), Diagnostic and Rectification, Electric and Hybrid Car Servicing* dan *Charging Station*.

48. PR-1523-L21348

Dato' Ngeh Koo Ham [Beruas] minta **MENTERI PELABURAN, PERDAGANGAN DAN INDUSTRI** menyatakan bagaimana pelaburan-pelaburan dari negara China berjumlah lebih kurang RM190 bilion akibat lawatan 2 kali Perdana Menteri ke negara China boleh masuk ke Malaysia apabila negara China mempunyai polisi ketat tidak membenarkan wang Renminbinya keluar dari negara China.

49. PR-1523-L22083

Datuk Andi Muhammad Suryady bin Bandy [Kalabakan] minta **MENTERI PELABURAN, PERDAGANGAN DAN INDUSTRI** menyatakan adakah terdapat sebarang rundingan semasa diadakan oleh pihak Kementerian bersama dengan Kerajaan Indonesia bagi merencana pelan strategik untuk meneroka kawasan di sempadan Sabah terutamanya Kalabakan yang berpotensi untuk dibangunkan sebagai kawasan perindustrian bermargin tinggi bagi menampung limpahan pembangunan yang akan diperolehi daripada Nusantara.

50. PR-1523-L21273

Tuan Chiew Choon Man [Miri] minta **MENTERI PELABURAN, PERDAGANGAN DAN INDUSTRI** menyatakan jumlah pelaburan asing dan pecahan mengikut jenis pelaburan tersebut di Bandar Raya Miri serta potensi bandar raya ini dalam menarik pelaburan asing.

51. PR-1523-L22510

Dato' Seri Dr. Wan Azizah Wan Ismail [Bandar Tun Razak] minta **MENTERI EKONOMI** menyatakan peratus nisbah bandar miskin sebelum dan selepas pandemik COVID-19 dan langkah-langkah merapatkan jurang pendapatan antara kawasan luar bandar dan bandar untuk mencapai ekonomi MADANI yang seimbang and inklusif.

52. PR-1523-L21256

Dato' Sri Richard Riot anak Jaem [Serian] minta **MENTERI PELABURAN, PERDAGANGAN DAN INDUSTRI** menyatakan apakah status terkini perdagangan dua hala Malaysia dan Indonesia melalui ICQS Tebedu.

53. PR-1523-L21601

Dato' Sri Ismail Sabri bin Yaakob [Bera] minta **MENTERI EKONOMI** menyatakan program-program yang telah dilaksanakan di bawah Inisiatif Pendapatan Rakyat (IPR) selain pengusaha mesin penjual (*vending machine*). Sejauh manakah impak *vending machine* ini terhadap usaha membasmi kemiskinan di negara ini.

54. PR-1523-L21463

Tuan M. Kulasegaran [Ipoh Barat] minta **MENTERI SUMBER MANUSIA** menyatakan :

- (a) sama ada Kerajaan masih berhasrat untuk membenarkan TVET beroperasi selepas waktu pejabat atau tidak supaya orang dewasa yang sedang bekerja dapat meningkatkan kemahiran mereka. Jika tidak, mengapa tidak; dan
- (b) apakah kadar kejayaan semasa kemahiran semula (*reskilling*) dan peningkatan kemahiran (*upskilling*) pekerja di negara ini dan bilakah sasaran 50% pekerja mahir dapat dicapai.

55. PR-1523-L21936

Dato' Haji Mohd Suhaimi bin Abdullah [Langkawi] minta **MENTERI SUMBER MANUSIA** menyatakan kursus-kursus jangka pendek ditawarkan kepada pelajar dengan kerja sama industri yang terlibat, apakah mereka akan ditawarkan gaji dan berapakah gaji minima.

ATURAN URUSAN MESYUARAT DAN USUL-USUL

1. (D.R. 31/2023) Rang Undang-undang Perbekalan 2024 - **Menyambung semula perbahasan atas masalah, "Bahawa Rang Undang-Undang ini dibacakan kali yang kedua sekarang," (30 Oktober 2023)**

DAN

Usul dibuat oleh YAB Menteri Kewangan dan masalah dicadangkan :-

“Bahawa Dewan ini, mengikut subseksyen 4(3) Akta Kumpulan Wang Pembangunan 1966 [Akta 406], membuat ketetapan iaitu suatu jumlah wang sebanyak tidak lebih dari sembilan puluh dua bilion ringgit (RM92,000,000,000) dibelanjakan daripada Kumpulan Wang Pembangunan bagi tahun 2024, dan bagi tujuan dan butiran Perbelanjaan Pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2024, yang dibentangkan sebagai Kertas Perintah 34 Tahun 2023, adalah diuntukkan di bawah Maksud-maksud yang berkenaan jumlah-jumlah yang bersempena dengan butiran-butiran itu di ruangan enam dan tujuh senarai tersebut.”

Menyambung semula perbahasan atas masalah (30 Oktober 2023)

2. (D.R. 33/2023) Rang Undang-Undang Syarikat (Pindaan) 2023 - **Menyambung semula perbahasan atas masalah, "Bahawa Rang Undang-undang ini dibacakan kali yang kedua sekarang," (12 Oktober 2023)**

[Menteri Perdagangan Dalam Negeri dan Kos Sara Hidup]

3. (D.R. 25/2023) Rang Undang-Undang Kawalan Produk Merokok Demi Kesihatan Awam 2023 – **Bacaan Kali Yang Kedua**

Dan;

Pengerusi Jawatankuasa Pilihan Khas Kesihatan oleh Yang Berhormat Datuk Seri Dr. Dzulkefly bin Ahmad, Ahli Parlimen Kuala Selangor akan mencadangkan :

“**BAHAWA** Penyata yang disiapkan oleh Jawatankuasa Pilihan Khas Kesihatan untuk mengkaji Rang Undang-Undang Kawalan Produk Merokok Demi Kesihatan Awam 2023, yang dibentangkan dalam Majlis ini sebagai Kertas DR. 8 Tahun 2023 diperkenankan mengikut Peraturan Mesyuarat 60”.

4. (D.R. 26/2023) Rang Undang-Undang Makanan (Pindaan) 2023. **Bacaan Kali Yang Kedua**
[Menteri Kesihatan]

5. PR-1523-U(27)278
Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk segera menangani isu gangguan bekalan beras putih tempatan (BPT) di pasaran yang kian meruncing susulan tindakan India menghentikan eksport beras putihnya ke pasaran.

Langkah penetapan had pembelian maksimum 100kg BPT untuk setiap individu dan syarikat bermula 7 September 2023 hanyalah penyelesaian yang bersifat sementara dan Kerajaan seharusnya mula merangka satu pelan yang lebih tuntas dalam usaha menjamin keterjaminan bekalan beras di Malaysia bagi jangka masa yang panjang.

Kerajaan perlu segera mewujudkan rangka tindakan yang lebih komprehensif bagi mengurangkan impak inflasi makanan global dari terus menghimpit rakyat negara ini khususnya berkaitan beras yang menjadi makanan ruji kita semua."

[Menteri Pertanian dan Keterjaminan Makanan]

6. PR-1523-U(27)279
Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan mencari penyelesaian untuk mengurangkan kos pengambilan pekerja asing yang kian melambung tinggi. Kebergantungan majikan tempatan terhadap pekerja asing berbanding pekerja tempatan di negara ini bukanlah perkara asing terutama dalam sektor 3D (*dirty, dangerous and difficult*).

Maka, adalah penting untuk mewujudkan satu dasar yang lebih komprehensif bagi mengurangkan kebergantungan terhadap pekerja asing agar pekerja tempatan diberi keutamaan terlebih dahulu dengan reformasi terhadap ekosistem sektor 3D meliputi kadar gaji, faedah dan sebagainya yang berpadanan dengan risiko pekerjaan perlu diimplementasikan secara berseiringan."

[Menteri Dalam Negeri]

7. PR-1523-U(27)280

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk mewujudkan satu dasar mengutamakan sajian menu buah-buahan tempatan di semua majlis rasmi Kerajaan sebagai galakan dan sokongan kepada pemain industri buah-buahan tempatan serta ke arah membudayakan amalan pemakanan sihat.

Adalah menjadi tanggungjawab Kementerian bagi membantu pengusaha buah-buahan tempatan untuk memasarkan serta mempromosi hasil ladang mereka dan sekali gus meningkatkan pendapatan. Maka melalui sajian menu buah-buahan di kesemua majlis rasmi Kerajaan perlu dibudayakan sepenuhnya sebagai sokongan terhadap industri buah-buahan tempatan.

[Menteri Pertanian dan Keterjaminan Makanan]

8. PR-1523-U(27)281

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan perancangan jangka masa panjang yang menyeluruh dalam memastikan Jumlah Kadar Kesuburan (Total Fertility Rate) bagi rakyat Malaysia terus meningkat.

Negara kita telah beralih ke status negara menua pada tahun 2021. Hal ini kerana peratusan penduduk berusia 65 tahun dan ke atas telah mencapai 7% daripada jumlah populasi. Trend ini menunjukkan peningkatan dalam dua tahun lalu pada kadar 0.2 peratus setahun di mana pada tahun 2022 sebanyak 7.2% dan dijangka pada tahun 2023 mencapai 7.4%.

Dalam tempoh dua dekad lagi, negara dijangka beralih kepada negara tua apabila kohort umur yang sama mencapai 14% daripada jumlah populasi. Peralihan ini tentunya memberikan kesan yang paling ketara iaitu kepada penurunan trend populasi pekerja dan produktiviti. Bagi menghadapi cabaran dan dampak negara menua, kita perlu mencari jalan memperlahankan proses penuaan ini. Proses penuaan ini tidak boleh dihalang atau diberhentikan tetapi kita perlu mempunyai pelan persediaan bagi menghadapi situasi tersebut.

Jika kita teliti jumlah peratusan struktur umur penduduk yang berumur 0-14 tahun berlaku penurunan pada kadar 0.4% bagi 3 tahun iaitu ; tahun 2020 sebanyak 24%, 2021 sebanyak 23.6%, 2022 sebanyak 23.2%, dan 2023 sebanyak 22.6%.

Umum mengetahui negara-negara jiran dan serantau juga menghadapi perkara penurunan bagi jumlah kadar kesuburan, tetapi kadar tersebut agak perlahan penurunannya. Sehubungan itu, objektif kita agar dapat melandaikan graf penurunan ini bagi negara kita.

Persoalan saya, apakah kemampuan hospital Kerajaan dalam meningkatkan kemampuan kesihatan reproduktif. Berapa jumlah Hospital yang menyediakan perkhidmatan IUI dan IVF. Berapa ramai doktor pakar reproduktif masih berkhidmat di hospital Kerajaan. Adakah harga perkhidmatan yang dikenakan mampu diakses oleh rakyat. Berapa jumlah makmal reproduktif.

Dewan Rakyat juga perlu mencadangkan agar Kerajaan menetapkan polisi yang mampan seperti fleksibel waktu bekerja, yuran pusat penjagaan kanak yang mampu bayar, perbanyakkan pusat asuhan ditempat kerja, dan *paternity leave* kepada ibu bapa yang bekerja untuk meringankan bebanan mereka dalam meningkatkan kadar reproduktif rakyat Malaysia. *Population Complexity* ini yang harus kita uruskan dengan penuh keberanian dan semua pihak kena bersama-sama."

[Menteri Pembangunan Wanita, Keluarga dan Masyarakat]

9. PR-1523-U(27)283

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan sebuah Kertas Putih Imigresen yang membincangkan tentang kadar atau jumlah sebenar kemasukan pelawat asing ke negara Malaysia.

Perkara ini bertujuan untuk mengetahui pergerakan pelawat asing berkenaan sama ada mereka terus tinggal di Malaysia atau dalam satu tempoh tertentu. Menerusi ini kita akan mengetahui jumlah sebenar populasi rakyat di negara ini melalui pengenalpastian perbezaan antara jumlah Warganegara Malaysia, Jumlah Pelawat Asing yang masuk ke negara kita sebagai pekerja ataupun dengan tujuan melancong.

Hal ini, akan memudahkan Kerajaan untuk merangka dan melaksanakan pelbagai pelan inisiatif mahupun bantuan seperti subsidi bersasar dan lain-lain agar setiap pelaksanaan tersebut dinikmati oleh rakyat di negara kita."

[Menteri Dalam Negeri]

10. PR-1523-U(27)286

Datuk Seri Panglima Madius Tangau [Tuaran] akan mencadangkan :

"Bahawa Dewan ini menerima hakikat bahawa lebih 100,000 calon peperiksaan SPM pada tahun 2022 telah gagal dalam mata pelajaran dan sekaligus gagal mendapat Sijil Pelajaran Malaysia (SPM).

Menerima hakikat juga bahawa kegagalan dalam peperiksaan SPM ini mengakibatkan masa depan yang gelap kepada calon pada purata 70 ribu hingga 100 ribu setahun.

Menerima hakikat bahawa pelajar tercicir ini tidak ada lagi ruang untuk melanjutkan pelajaran maka segolongan pelajar tercicir ini akan menjadi kerugian dalam sumber tenaga kerja negara.

Dan menerima hakikat bahawa matlamat mendidik sebuah generasi pelajar untuk membina dan membangun negara kita telah gagal maka Kerajaan hendaklah mengambil tindakan yang serius terhadap masalah ini.

Maka dengan itu Dewan Yang Mulia ini hendaklah membuat ketetapan agar silibus dan buku-buku teks Subjek Sejarah Tingkatan Satu, Dua, Tiga, Empat dan Tingkatan Lima hendaklah dikaji semula dan sebuah Jawatankuasa Pilihan Khas Parlimen hendaklah ditubuhkan untuk mendapat pandangan daripada setiap lapisan masyarakat daripada seluruh pelusuk negara, dan pada masa yang sama Jemaah Kabinet hendaklah menubuhkan sebuah Jawatankuasa Kabinet Kajian Semula Silibus dan Buku Teks Sejarah yang dianggotai oleh Menteri-Menteri yang mewakili Sabah, Sarawak, Persekutuan Tanah Melayu dan parti-parti politik yang menubuhkan Kerajaan Perpaduan."

[Menteri Pendidikan]

11. PR-1523-U(27)287

Datuk Seri Panglima Madius Tangau [Tuaran] akan mencadangkan :

"Bahawa Dewan ini Menerima hakikat bahawa sebuah Suruhanjaya Siasatan DiRaja yang ditubuhkan oleh Kerajaan suatu ketika dahulu telah berjaya membuat siasatan dan seterusnya telah dibentangkan di Dewan Yang Mulia ini.

Dan menerima hakikat bahawa setelah sekian lama laporan tersebut telah gagal dilaksanakan dan mengakibatkan ketidakpuasan hati sebahagian besar daripada rakyat Malaysia.

Menerima hakikat juga bahawa rakyat tertanya-tanya apakah yang telah terjadi dengan laporan Suruhanjaya Siasatan DiRaja tersebut.

Dan menerima hakikat bahawa kecelaruan urus tadbir Pendatang Tanpa Izin; Penduduk Asing di Sabah yang mempunyai Kad Pengenalan yang meragukan; Peningkatan Bilangan penduduk di Sabah Tanpa Kewarganegaraan ataupun *stateless children* dan kehadiran orang asing yang memegang dokumen IMM13 yang tidak ada halatuju.

Maka Dewan Yang Mulia ini hendaklah membuat ketetapan bahawa sebuah Jawatankuasa Pilihan Khas Parlimen untuk meneliti dan mengkaji semula rekomendasi dan perakuan Laporan Suruhanjaya Siasatan DiRaja Mengenai Pendatang Asing Tanpa Izin untuk merumuskan suatu Road Map penyelesaian tuntas terhadap masalah oleh empat kategori penduduk golongan pendatang asing di Sabah."

[Menteri Dalam Negeri]

12. PR-1523-U(27)290

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan meletakkan sebuah garis panduan untuk sekolah-sekolah bagi pengurusan dana, perbelanjaan, dan juga aktiviti kutipan wang daripada pelajar, ibu-bapa, dan orang ramai. Selain itu, sebuah badan pemantau perlu diwujudkan bagi memastikan garis panduan ini dipatuhi. Ini kerana, kini sudah menjadi sebuah kelaziman untuk pihak-pihak sekolah menganjurkan program-program dan majlis-majlis yang memakan belanja besar, yang menggunakan duit daripada poket pelajar. Sebahagian daripada majlis ini mewajibkan kehadiran, dan sebahagian lainnya adalah secara sukarela. Tetapi harus kita faham, kewujudan jurang ekonomi akan membuatkan wujudnya golongan pelajar yang rasa keciciran sosial disebabkan faktor kewangan keluarga. Ia juga membuat mereka berasa tertekan serta memberi tekanan kepada ibu-bapa, lebih-lebih lagi dalam situasi ekonomi kini. Bukan sahaja untuk majlis, malah sering juga pihak sekolah membuat kutipan wajib bagi pembaharuan infrastruktur, dan kutipan ini kadangkala boleh mencecah ratusan ringgit. Isu ini merupakan sebuah isu yang kurang mendapat perhatian tetapi penting untuk dibawa ke hadapan kerana ia melibatkan sosioekonomi keluarga B40 dan M40 serta kesejahteraan perkembangan minda dan emosi para pelajar yang bakal menjadi teraju negara ini di masa hadapan. Selain itu, dibimbangi jika tiada pemantauan dilakukan, perkara ini akan membuka ruang untuk pihak tertentu mengambil kesempatan."

[Menteri Pendidikan]

13. PR-1523-U(27)291

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan mengambil langkah pro-aktif dalam menangani serta menghentikan kes jenayah dera kanak-kanak di negara ini. Menteri Dalam Negeri pada 14 Mac 2023 melaporkan bahawa terdapat 220 kes kanak-kanak mati akibat penderaan antara tahun 2018 hingga 2022. Data Kementerian Pembangunan Wanita, Keluarga dan Masyarakat antara Januari hingga Jun 2022 juga mendedahkan terdapat 1,055 kes penderaan kanak-kanak di negara ini. Kanak-kanak adalah masa depan negara. Lantaran itu, pihak kerajaan wajar menangani lantas menghentikan kitaran dera ini dengan sebuah target 'Dera Sifar' menerusi langkah-langkah pro-aktif seperti mewajibkan kursus penjagaan anak, mewujudkan sistem pemantauan berkala, meneliti semula undang-undang serta garis panduan berkenaan penjagaan kanak-kanak, meningkatkan kesedaran masyarakat, dan lain-lain."

[Menteri Dalam Negeri]

14. PR-1523-U(27)292

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat menggesa Kerajaan mengambil tindakan yang lebih pro-aktif dan efisien bagi meningkatkan kesedaran, tindak balas, dan kerjasama masyarakat dalam menghadapi bencana alam. Kerajaan telah mengumumkan penubuhan Pusat Bencana Geologi Negara pada akhir tahun ini serta pembangunan Sistem Amaran Awal Tanah Runtuh (SAATR). Inisiatif ini akan dapat meningkatkan kecekapan tindak balas bencana agensi-agensi berkaitan. Bagaimana pula dengan tindak balas masyarakat."

Apa yang telah dan sedang Kerajaan usahakan bagi memastikan rakyat bukan sahaja peka tetapi takut dan patuh kepada arahan yang dikeluarkan oleh pihak berkuasa. Kerajaan perlu menguatkuasakan Akta Pertahanan Awam 1951, Akta 221 bawah seksyen 4 (C) di mana tindakan boleh diambil ke atas mereka yang tidak patuh kepada arahan pihak berkuasa contohnya arahan untuk berpindah dalam situasi banjir yang boleh membahayakan penduduk dan pada masa yang sama memberi risiko kepada penyelamat."

[Perdana Menteri]

15. PR-1523-U(27)293

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan menubuhkan badan siasatan bebas bagi mengenal pasti secara terperinci punca utama yang menyebabkan kekurangan bekalan makanan seperti beras tempatan, ayam dan telur ayam di pasaran serta merangka perancangan penyelesaian jangka pendek dan panjang yang komprehensif termasuk penguatkuasaan terhadap golongan kartel orang tengah serta menambahkan daya pengeluaran bekalan makanan. Rakyat baik dari kalangan pengguna mahupun pengusaha restoran kecil masih mengeluh dengan permasalahan ini yang menyebabkan kenaikan harga bekalan makanan. Kerajaan tidak seharusnya melepaskan tanggungjawab menjaga keterjaminan bekalan makanan kepada individu (sebagai *end user*) mahupun menyarankan penyelesaian jalan mudah seperti menambah import makanan tetapi mencari penyelesaian sepanjang rangkaian jaringan bekalan bahan makanan mentah."

[Menteri Pertanian dan Keterjaminan Makanan]

16. PR-1523-U(27)294

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mewujudkan pusat benih padi khusus di kawasan utara khususnya di Arau, Perlis bagi membekalkan benih-benih padi yang bermutu tinggi dan membolehkan penyelidikan yang agresif dibuat bagi menghasilkan benih padi baru di samping menyelesaikan masalah ketidakcukupan benih padi di pasaran. Pusat Benih Padi adalah penting untuk mengumpul benih padi yang lebih berdaya komersial, lebih berdaya tahan iklim (*climate resistant*) dan sesuai dengan cuaca di kawasan utara Semenanjung Malaysia. Pusat ini juga boleh berperanan menjalankan kajian di peringkat serantau dan melibatkan penyelidik daripada negara-negara jiran seperti Thailand, Indonesia dan Myanmar yang mempunyai tanaman baka padi yang berdaya komersial tinggi."

[Menteri Pertanian dan Keterjaminan Makanan]

17. PR-1523-U(27)295

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji semula peruntukan khas yang boleh diberikan kepada pekebun kecil, penternak dan nelayan yang terjejas akibat situasi iklim yang tidak menentu serta kenaikan harga barang. Kerosakan tanaman dan kematian ternakan seringkali mendatangkan kerugian besar hingga kepada jutaan ringgit setiap kali berlaku bencana alam. Dengan situasi semasa ekonomi negara yang tidak stabil juga secara tidak langsung akan memberi tekanan kepada kos sara hidup pekebun kecil, penternak dan nelayan yang kebanyakannya bergantung harap kepada sumber pendapatan tersebut sahaja. Maka pemberian peruntukan khas ini dapat menambah baik kehidupan mereka."

[Menteri Pertanian dan Keterjaminan Makanan]

18. PR-1523-U(27)296

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyegerakan pembinaan dan baik pulih tembok sempadan Malaysia-Thailand supaya merangkumi keseluruhan perbatasan dari Perlis hingga Kelantan dan menyediakan suatu pelan tindakan komprehensif merangkumi semua agensi Kerajaan bagi kawalan sempadan Malaysia-Thailand. Sempadan Malaysia-Thailand adalah sepanjang kira-kira 656km namun hanya 111 km sahaja yang berpagar. Sebahagian tembok sempadan antara Malaysia dan Thailand di sepanjang Laluan Keselamatan dan Pembangunan (KESBAN) dilihat sudah usang manakala peralatan kamera litar tertutup (CCTV) dan alat pengimbas perlu ditambah, dibaik pulih dan dinaik taraf dengan teknologi terkini seperti penggunaan dron. Beberapa insiden pada masa lalu seperti kes tembakan ke atas pasukan keselamatan negara dan bermaharajalelanya sindiket pemerdagangan manusia seperti yang berlaku di insiden Wang Kelian serta penyeludupan barangan termasuk dadah dan senjata menunjukkan betapa kritikalnya keperluan untuk meningkatkan tahap keselamatan di perbatasan. Kerajaan Malaysia sebelum ini telah memberikan komitmen untuk membina tembok sempadan tersebut tetapi sehingga terkini masih tiada pelan pembangunan komprehensif dan terperinci yang diumumkan. Mohon pihak kerajaan memandang serius perkara ini dengan menyegerakan pembangunan tembok sempadan Malaysia-Thailand secara menyeluruh dan memastikan suatu pelan komprehensif merangkumi semua agensi Kerajaan bagi kawalan sempadan Malaysia-Thailand agar benar-benar berkesan menjamin keselamatan perbatasan negara."

[Perdana Menteri]

19. PR-1523-U(27)297

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya agihan peruntukan pembangunan dan pelaksanaan projek pembangunan di peringkat negeri diberikan mengikut keutamaan dan keperluan Kerajaan Negeri. Berdasarkan pelan RMK-12, enam negeri kurang membangun akan terus diberi keutamaan dengan agihan sekurang-kurangnya 50% daripada keseluruhan peruntukan Perbelanjaan Pembangunan Asas Persekutuan. Namun begitu, terdapat beberapa projek yang diluluskan oleh Kerajaan Persekutuan tidak mengambil kira cadangan dan hasrat Kerajaan Negeri khususnya di Perlis untuk mempelbagaikan fungsi sesuatu projek sedangkan Kerajaan Negeri mempunyai dasar serta hala tuju yang telah mengambil kira pelbagai keperluan dan kehendak semasa serta pada masa hadapan. Misalnya, Projek Lencongan Banjir Barat Timah Tasoh yang telah dilaksanakan pada tahun 2015, di mana dalam pembinaan terowong banjir terdapat skop pembinaan pada item pencahayaan di dalam terowong berjumlah RM300 ribu. Namun, skop berkenaan telah dikeluarkan atas alasan penjimatan. JPS Perlis selaku pelaksana projek telah membangkitkan perkara ini supaya dikekalkan atas faktor keselamatan dan memudahkan kerja pemantauan serta penyelenggaraan di dalam terowong di masa hadapan. Akan tetapi, ianya masih tetap dikeluarkan daripada skop asal projek."

[Menteri Ekonomi]

20. PR-1523-U(27)298

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Kerajaan tidak boleh hanya memperkenalkan inisiatif yang hanya sekadar '*rebranding*' daripada Kerajaan sebelum ini kerana perubahan yang besar perlu dilakukan bagi mendepani kenaikan kos pembinaan disebabkan kenaikan harga barang binaan. Dasar Perumahan Negara (2018-2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah dijadikan salah satu sasaran kajian semula Dasar Perumahan

Negara dan memerlukan input dari pelbagai Agensi dan Kementerian serta pihak bukan Kerajaan dan bukan dari satu Kementerian sahaja. Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini juga akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40."

[Perdana Menteri]

21. PR-1523-U(27)299

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan melaksanakan segera projek-projek tebatan banjir di seluruh negara untuk memastikan projek ini dilaksanakan secara holistik dan dapat mencari jalan penyelesaian kepada isu banjir yang semakin meruncing akibat kesan perubahan iklim dan pembangunan yang tidak mesra alam. Antara projek yang perlu dilaksanakan segera adalah seperti Projek Pembangunan Sungai Bersepadu (PLSB) Sungai Golok (KESBAN) dan Sungai Kelantan. Dengan pembinaan projek tersebut, risiko banjir besar dapat dikurangkan. Di samping itu, projek tebatan banjir di Selangor khususnya di Shah Alam dan bandar Kuala Lumpur juga diharapkan dapat dilaksanakan dengan komprehensif agar dapat menangani masalah banjir kilat."

[Menteri Sumber Asli, Alam Sekitar dan Perubahan Iklim]

22. PR-1523-U(27)300

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan melaksanakan satu perancangan persediaan dan pengurusan risiko bagi menghadapi bencana alam dapat disemak semula akibat impak perubahan iklim yang sangat drastik sejak kebelakangan ini. Hal ini demikian kerana perancangan rapi penting bagi memastikan tahap kesiapsiagaan anggota terlibat berada di tahap yang tinggi. Di samping itu, Kerajaan juga perlu merencana satu langkah holistik bagi mendidik masyarakat agar bersiaga siaga untuk menghadapi bencana alam kerana kesedaran terhadap isu ini di dalam kalangan masyarakat masih berada di tahap yang rendah berdasarkan peristiwa bencana alam yang lepas."

[Perdana Menteri]

23. PR-1523-U(27)301

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya membentuk satu pasukan petugas khas bagi memberi perhatian terhadap isu pencerobohan sempadan yang berlaku di Sabah dan Sarawak. Seperti di ketahui, Sabah dan Sarawak pula berkongsi sempadan darat sejauh 2,019.5km dengan Kalimantan, Indonesia. Daratan Negara Brunei Darussalam dibatasi sepenuhnya oleh Sarawak sepanjang 481.3km. Kebanyakan kawasan perbatasan Malaysia bersama negara-negara jirannya terletak di kawasan perbukitan yang diliputi hutan tebal dan kawasan perairan laut menyebabkan kawalan terhadap kawasan-kawasan ini sulit dilakukan. Oleh sebab itu, masalah pencerobohan, penyeludupan, pemerdagangan manusia dan perdagangan narkotik adalah antara isu yang saban tahun masih berlaku dan sukar ditumpaskan. Dengan siapnya Lebuhraya Sematan – Telok Melano juga baru-baru ini secara tidaklangsungnya meningkatkan risiko pencerobohan sempadan sama ada melalui darat dan laut terutamanya melalui Taman Negara Tanjong Datu. Oleh hal yang demikian, tindakan segera Kerajaan bagi mencari solusi terbaik kepada masalah kawalan sempadan ini adalah amat diharapkan."

[Menteri Dalam Negeri]

24. PR-1523-U(27)302

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya melaksanakan tindakan kawalan yang lebih ketat berkenaan jualan arak. Garis panduan yang khusus perlu dikaji dan diwujudkan oleh Kerajaan bagi mengawal penjualan arak yang meliputi waktu dan tempat jualan arak yang seragam dan boleh diguna pakai di seluruh negara bagi tujuan mengelakkan masalah sosial yang sering timbul seperti masalah rumah tangga dan kemalangan jalan raya. Oleh yang demikian, keseragaman tindakan daripada Kementerian Kewangan dan Pihak Berkuasa Tempatan (PBT) adalah amat diperlukan sekiranya ingin melaksanakan tindakan kawalan yang lebih ketat terhadap jualan arak kerana ketika ini ketidakseragaman tindakan antara dua entiti ini menjadi antara punca kawalan jualan arak tidak dapat dilaksanakan secara efektif dan efisien."

[Menteri Kewangan]

25. PR-1523-U(27)303

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan bersikap adil dalam mengamalkan kebebasan media di Malaysia. Kerajaan tidak seharusnya menjadikan Suruhanjaya Komunikasi Multimedia Malaysia (SKMM) sebagai alat politik untuk menyekat mana-mana isi kandungan media yang tidak '*pro*' Kerajaan atau tidak sependapat dengan Kerajaan. YAB Perdana Menteri yang memerintah Kerajaan pada masa ini telah berikrar dalam manifestonya untuk memastikan hak kebebasan bersuara dan melindungi kebebasan media. Namun, keadaan sebaliknya berlaku selepas beberapa bulan beliau membentuk Kerajaan. Lebih mendukacitakan, kebebasan media yang diwar-warkan Kerajaan hanyalah terhad kepada '*pro*' Kerajaan sahaja, manakala parti pembangkang secara halus dikenakan sekatan kepada akses media. Mana-mana media rasmi Kerajaan mahupun swasta tidak diberi kebenaran untuk menyiarkan berita mengenai parti pembangkang mahupun pihak yang menentang Kerajaan. Oleh demikian, Kerajaan digesa supaya berlaku adil dalam menyalurkan maklumat kepada rakyat. Tindakan ini adalah penting untuk memastikan hak kebebasan media tidak dicabul sewenang-wenangnya oleh pihak-pihak tertentu."

[Menteri Komunikasi dan Digital]

26. PR-1523-U(27)304

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyediakan perancangan, peruntukan dan prasarana kepada pelajar-pelajar universiti, kolej, STPM dan SPM bagi menghadapi kaedah pembelajaran alaf baru seperti pembelajaran dalam talian dan menggunakan media elektronik. Ini bagi membolehkan dan mendedahkan mereka ke alam teknologi siber dan e-pembelajaran yang semakin berkembang yang seterusnya memerlukan guru-guru yang terlatih dalam pendidikan alaf baru."

[Menteri Pendidikan]

27. PR-1523-U(27)305

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan mengkaji semula kawasan keluar dan masuk sempadan Malaysia-Thailand di Wang Kelian, Perlis. Sebelum ini, penduduk kedua-dua negara boleh menikmati kemudahan bergerak sehingga dua kilometer tanpa menggunakan pasport atau pas sempadan pada hari minggu. Kuatkuasa itu pernah dibuat bermula tahun 1993 hingga 2015. Akan tetapi, penarikan semula kemudahan kebebasan bergerak ini telah dibuat pada tahun 2015 kerana penemuan rangka manusia mangsa sindiket pemerdagangan manusia yang dipercayai etnik Rohingya. Susulan itu, Wang Kelian menjadi pekan mati hingga kini. Kerajaan Negeri Perlis cuba membangunkan semula kawasan pelancongan di Wang Kelian, namun ianya tidak semeriah dahulu. Justeru itu, Kerajaan diharapkan dapat mengkaji dan mempertimbangkan semula untuk memberi kemudahan bergerak di antara kedua-dua negara seperti sebelum ini. Dengan kemudahan tersebut, ianya akan dapat menjana semula perkembangan ekonomi khususnya buat penduduk tempatan yang sebelum ini amat rancak sebelum ditutup sepenuhnya pada tahun 2015. Semasa adanya '*Free Flow*' ini, Wang Kelian merupakan satu destinasi pelancongan yang amat meriah dan telah memberi ruang kepada peniaga-peniaga kecil di Perlis dan juga Selatan Thailand menambahkan pendapatan mereka."

[Menteri Dalam Negeri]

****UCAPAN-UCAPAN
(PERATURAN MESYUARAT 17)
(KAMAR KHAS)**

Tarikh Ucapan	Ahli Yang Berucap	Tajuk Ucapan	Menteri Yang Bertanggungjawab
1. 31.10.2023 (Selasa)	1. YB Tuan Tan Kar Hing (Gopeng)	1. Keberkesanan Pelan Strategik Jabatan Kemajuan Orang Asli (JAKOA)	1. YB Menteri Kemajuan Desa dan Wilayah
2. 31.10.2023 (Selasa)	2. YB Tuan Tan Kar Hing (Gopeng)	2. Pembinaan Sekolah Rendah dan Sekolah Menengah di Bandar Seri Botani	2. YB Menteri Pendidikan
3. 31.10.2023 (Selasa)	3. YB Tuan Abdul Latiff bin Abdul Rahman (Kuala Krai)	3. Projek Jambatan Kampung Pasir Era - Pasir Kelang	3. YB Menteri Kemajuan Desa dan Wilayah
4. 31.10.2023 (Selasa)	4. YB Tuan Abdul Latiff bin Abdul Rahman (Kuala Krai)	4. Pembinaan Jejambat di Cabang 3 Guchil	4. YB Menteri Kerja Raya

**** Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17)**